

La muart di **Franco Marchetta** e à lassât un vuet che no si podarà colmâ in curt. Vindicôr par trê voltis dal Premi Sant Simon al veve l'obietf di rialfabetizâ i furlans inte lôr lenghe. >> DI **WALTER TOMADA**



Franco Marchetta

Scritôr sclâf de veretât

No son dubiis: pôcs a cognossevin pardabon il Friûl, cu lis sôs contradizions e la grande potenzialitât de sô lenghe, come **Franco Marchetta**, mancjât a 62 agns la setemane passade par colpe di une malatie masse brute, che no à lassât sperance ma un vuet che no si podarà colmâ in curt.

L'autôr di tancj libris che a restaran dai modei di stîl e di vivarisât narrative, vindicôr par trê voltis dal Premi Sant Simon, al veve un sol obietf: rialfabetizâ i furlans inte lôr lenghe. No cu la costrizion, ma

cul podê straodenari des contis. E cu la convinzion che locâl e globâl si messedin prin di dut inte leterature.

IL PLASÊ DE SPERIMENTAZION

Ogni aspjet dal vivi al jere bon par meti dongje une storie, ogni maniere di cjâlâ il mont par Franco e mertave di jevâ a la dignitât de leterature. Parcè che ogni voli difarent secont lui al inluminave prospetivis diversis, che se scoltadis nus lassavin plui siôrs. La sô carriere di scritôr e je stade une vore penze

di creazioni, ma la culture furlane, soredut la critiche e la stampe, no le an mai valorizade cemût che il valôr dai siei libris al varès mertât: colpe dal so jessi sclâf de veretât, amî de reson, nimî des ipocrisiis e de sotanance prin di dut inteletuâl che in tancj in Friûl ancjemò a doprin come uniche maniere di so-revivi. Franco invezit al jere bon di fevelâ dome sclet, magari cuntune ponte di ironie che di solit e jude, ma che i furlans non son tant bogns di preseâ.

Inte leterature furlane al à puartât il plasê de sperimentazion di formis narativis mai viodudis. A parût di "Gilez", romanç di une postmodernitât cussì inteligjente che il Friûl ancjemò no le veve cognossude. Ma la sô abilitât te citazion e te ricombinazion e à cjetât il plui alt dai siei esits intes "Cronachis di Saveri Sengar" e soredut tal mont di "U", une fantafiction dulà che une psicopolizie che e semee tirade fûr di Orwell e fâs si pore, ma no rive a impedî la contaminazion des contis.

TESTAMENT SPIRITUÂL

Il testament spirituâl di Marchetta al è stât un libri fulminant e eretic, "Camaleonti e porcospini": une sgrife sul Friûl di vuê, scrite par talian, di mût che duçj a scugnissin capî. Mi veve dit: "se non rivarai a stiçâ un dibatit cun chest libri, al vûl di che o sin pardabon metûts mâl". Il romanç nol al à vût il sucès che si spietave: ma al è forsît il libri che al piture miôr la nestre tiere, cui siei paradòs come il "Di bessoi" che i furlans a glorifichin, ma che in realtât al è il lôr piês limit. Cumò ançje lui nus à lassâts pardabon "Di bessoi". Masse adore, Franco, masse adore.



ilfriuli@ilfriuli.it

GNÛF LIBRI

Nascimbeni al presente la sô opare

Al sarà presentât vinars ai 6 di Jugn a Udin te sale dal Consei de Provincie, in place Patriarcjât, 'Remo e sô fie' la ultime fadie dal scritôr **Adriano Nascimbeni**, za vindicôr tal 2013 dal premi 'Un zâl par furlan' di Spilimberc cul romanç 'Muart in lagune'.

Al event a parteciparan il President de Provincie di Udin **Pietro Fontanini** e **Fausto Zof** in cualitât di relatôr e curadôr de prefazion dal gnûf libri.



'Remo e sô fie', editât di bande di 'L'orto della cultura' di Pesian di Prât, al è un zâl a sfont psicologicj e sociâl che si fonde su la figure di un operari e sul so rapuart difcil cun sô fie.

Cun chesthe opare Nascimbeni al à za otignude la segnalazion dal premi San Simon tal 2013, ricognossiment che al à za otignût trê agns prime cul so prin romanç 'Jo e Luzie un delit di paîs'.

SCOLTADIS DI DRIUS

Scalogne

Toni 'dordel': "Viôt tu ce scalogne! Se nol ves tacât a plovi o sarès rivât a finî di bagnâ ta l'ort".



Euronews informa

La Provincie di Udin e promôf tirocinis pai zovins

Ascomencin i tirocinis promovûts di bande de Provincie di Udin. In coerence cui obietfs dal Proget di cooperazion teritoriâl europeane - program pe cooperazion transfrontaliere Italie-Slovenie clamât SEA (Social Economy Agency) e vignarà creade une liste di zovins di età comprendude jenfri i 18 e i 29 agns finîts che no àn otignût un diplome di scuele secundarie superior e che a sedin iscrits, jenfri la date di scjadince dal avis intun dai Centris pal implei de Provincie di Udin. Chesçj zovins, no ocupâts o disocupâts, a manifestin la lôr disponibilitât a fâ une esperience di tirocinis e al timp stes ançje lis aziendis dal teritori a àn di declarâ la lôr disponibilitât a tignî chesthe tipologie di lavoradôrs. Lis domandis e lis manifestazions di interès a podaran jessi presentadis fintremai aes oris 12 dai 9 di Jugn. I tirocinis a dovaran vê une durede comprendude jenfri un minim di 3 mès e un

Domande dentri dai 9 di Jugn; indenitât di 300 a 500 euros al mès

massim di 6 mès, par un totâl di oris setemanâls comprendudis jenfri 20 e 40 oris. Al fin di erogâ lis indenitâts ai tirocinants, si larà indenant su la fonde dal ordin cronologic di consegne des manifestazions di interès des aziendis. La Provincie di Udin e finanziairà dôs des indenitâts mensîls lordis che a spietin al tirocinant, rapuartadis al orari setemanâl (di 300 euros par orari setemanâl di 20 oris fin a 500 euros par orari setemanâl di 40 oris). Lis domandis di partecipazion a vignaran selezionadis dai Centris pal Implei metint in relazion lis caracteristichis dai candidâts e des candidadis cu lis



manifestazions di interès des aziendis. Al vignarà cussì individuât un zir di candidâts che a fasaran un coluoci di selezion cu la aziende. I tirocinis a dovaran jessi inviâts dentri dal 16 di Jugn. Ae scjadince dal tirocinis il Centri pal Implei, tant che sogjet promotôr, ançje su la fonde des valutazions dal sogjet ospitant, al da fûr al tirocinant un document che al ateste i risultâts, specificant lis competencis in câs acuisidis. Te suaze dal articulo 12, come 5 dal Regolament Regionâl Tirocinis, ai fins de registrazion de esperience di tirocinant sul libret formatif dal citadin, il tirocinant al à di vê partecipât almancul al 70% de sô durade in oris. La presentazion de domande di partecipazion no conferis ai candidâts nissune sigurece sul esit des selezions e il dirit su la efetive ativazion dal percors di tirocinis; a duçj chei che a varan aderît al proget, a vignaran ufierts moments di orientament pe ricercje dal lavor.